

**Zeitschrift:** Frauezeitig : FRAZ  
**Herausgeber:** Frauenbefreiungsbewegung Zürich  
**Band:** - (1978-1979)  
**Heft:** 12  
  
**Rubrik:** Leserinnenbriefe

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

**Download PDF:** 31.03.2025

**ETH-Bibliothek Zürich, E-Periodica, <https://www.e-periodica.ch>**

# Leserinnenbriefe

liebi frauzziitig-fraue,

scho lang emal han ich welle eu öppis schicke, won ich gschribe han. ide letschte frauzziitig händ ihr ja druf higwise, dass mer söll gedicht, photis und suschtigi bitrüg ischicke. vilicht könnnd ihr mini gedanke emal verwende, wenn nöd, machts au nüd. ich wird nüd truurig sii. ich han nämlich schuurig de plausch gha am gedichtli schribe. ich hans eigentli scho vor längere ziiit scho welle ischicke, aber mini schribmaschine hät immer gspunne, zwar au jetzt no, drum schrib ich au nur mit de chline buechstabe. die grosse wänd nüme eso recht. jetzt möcht ich no schnell öppis zu eure arbet säge und au öppis kritisiere.

ich finds schuurig guet und wichtig, dass d'fraue sich emanzipiert händ. dass sie sich zämegschlosse händ, dass gemeinsam schtark wänd sii. gege wen überhaupt? gege d'manne wahrschinli. es git übrighens au schwachi manne, und au settigi, wo grausam under em hammer vo de frau sind.

am anfang han ich die ganz freuebefreiigungsbewegig mit grossem interesse mitverfolgt und han immer d'emma und frauzziitig glese (das au jetzt no), und han sogar lang mit em gedanke gschpielt, ich well zu eu id fbb cho, um neuu fründine und fraue kennezlere, wo mer über alles chan rede und um fraue z'helfe, wo problem händ. aber mich dunkt langsam alles übertriebe. fasch wie mannehass. und das verschtah ich nüme unter emanzipation. ich find d'emanzipation jetzt schuurig eisiitig. ich glaub de maa häts jetzt nötig sich z'emanzipiere. jetzt isch nämli er unter em hammer. ich chan d'manne verschtah, wo säged si heiged angscht vo engagierte fbb-fraue.

ich finds eher wichtig, dass me sich zäme emanzipiert, d'frau, sowohl wie de maa. dass me zäme schtarch isch i de beziig die gliche recht und asprüch hät. dass es e roleteilig git und en partnerschaftsvertrag. für das itsträte find ich schuurig wichtig. aber nöd im ene extrem fall. mich hät folgendi situation bieu i de fbb bsunders möge. min fründ häts no viel me troffe, ja fasch hässig gmacht. und das chan ich verstah.

im letschte herbscht bin ich mit mim fründ zäme a de lavaterstrass gsi bi eu, will mer en verständnisvolle frauearzt oder en ärztin gsuecht händ. mir händ denkt ihr chöned eus helfe. min fründ staat au voll i de de frauebewegig, und hät mit eu au welle schwätze, aber wenn er öppis grögged hät, händ er nume mich aglueget und mir antwort ge. das während ener halbe schtund. das han ich schuurig schad gfunde, will das problem, wo mer gha händ, eus beidi agange isch, ihr aber nur mich akzeptiert händ. min fründ hät sich als mensch schuurig agriffegfühlt, hät sich aber nöd

rechtfertige chönne, will er vo dere reaktion so perplex gsi isch. er isch froh gsi, wo mer wieder dusse gsi sind. mier häts bi eu recht guet gfalle, bis uf das. ich trüg eu die reaktion au nöd nah, aber säge han ichs halt doch emal welle. ich hoffe ihr siget mir drum nöd bös.

mir lönd eus vo de manne nöd underdrücke, mir wänd aber au nöd maane underdrücke.

lueget mir de maa doch als person aa, und nöd als maa. werfed mer doch nöd alli maane, mit dene mir vilicht schlechti erfahrig gmacht händ, in gliche topf. en maa isch en mensch und e frau isch au en mensch, und genau die feschtschtellig sött eus mit ihne verbinde und nöt trenne.

ganz liebi grüess a eu alli

beatrice  
(19 Jahre)

salü du, salü zäme:

ich habe eine frage an die nicht und raucher, wieso nachahmt ihr die Männer?

- sie kann nicht mal richtig fragen, denkst du, und formulierst sie neu, die frage.

ich suche nach echten lebensformen, du auch?

- hmm, ja. aber ich weiss nicht wo.

ich dachte mir, wir könnnten mit folgendem beginnen: wenn uns nicht wohl ist, dann braucht es mut, dies so zuzugeben, dass es natürlich ist, wie z.B. hände waschen, sich schneuzen, etc. alles handlungen, die mit den

händen

zu tun haben. jetzt schaust du dir deine hände

an. also, ich muss schon sagen, meine wechseln je nach tageslicht und stimmung. meistens gefallen sie mir, manchmal verleiten sie mich zum philosophieren: ich habe noch alle finger, mein grossvater musste 2 hergeben, nicht freiwillig, klar. und dann werde ich ohnmächtig vor wut: wieso beugen wir uns der norm, die uns zwingt, alle unzulänglichkeiten zu vertuschen....eben, wieso ahmt ihr die schwachen nach, diese männern, die die nur geld, profit, industrie etc. sehen? die armen, die starken.

dian

es würde mich freuen, wenn dieses thema (frau + rauchen = frauchen) anlass zu diskussionen im sinne der besinnung und neuen vorschlägen wird. entschuldigung habe ich schon zuviele gehört, ich glaub ihnen trotzdem nicht.

barbara, 19 (dt, ital., frz., engl.)  
sucht zwecks studienfinanzierung  
vorzugsweise frauenbewegten - job  
vom 1.8. - 30.9.78 in zürich oder  
in der näheren umgebung.

zu erreichen über: angela thomas  
kirchgasse 26  
8001 zürich  
34 13 01

Ich bin 13 Jahre alt  
und heisse Marie.  
Ich suche "Maitli"  
zwischen 11 + 13 Jahren,  
um eine "Maitligruppe"  
zu machen.  
Wenn jemand Lust hat  
soll sie mir telefonieren  
tel. 69 17 89